

АРХЕОЛОГ-ҒАЛЫМ НҰРТАЗА АЛДАБЕРГЕНОВ 60 ЖАСТА!



2007 жылдың 20 қарашасында әл-Фараби атындағы Қазақ ұлттық университетінің тарих факультетінде ұзақ жылдар бойы дәріс оқыған, қазіргі кезде Отырар кешенді археология мұражайының Бас директоры, ғалым-археолог Нұртаза Алдабергенев 60 жасқа толды. Тарих факультетінің оқытушы-профессорлар құрамы, аспиранттары мен магистрлері мерейтой иесін туған күнімен құттықтап, оған зор денсаулық, мол бақыт, шығармашылық табыстар тілейді.

Н. Алдабергенев 1947 жылы 20 қарашада бұрынғы Шымкент облысы, Арыс қаласында дүниеге келді. 1965 жылы Арыс қаласындағы орта мектепті бітіргеннен соң Ташкент мемлекеттік университетінің тарих факультетінің археология бөліміне түседі. 1965-1970 жылдары археология бөлімінде оқи жүріп, Орта Азиядағы ортағасырлық қалаларды қазба жұмыстарына қатысады. 1970 жылы тарихшы-археолог мамандығын алып, Қазақ ССР Ғылым Академиясында аға лаборант, бұрынғы Қазақ ССР мәдениет министрлігінде археолог қызметін атқарады. 1973 жылдың қараша айынан бастап Қазақ мемлекеттік университетінде алғашында аға лаборант

болып қызметке тұрады да, кейіннен аспирантураға түседі. Осы жылдан бастап Н. Алдабергеневтың 30 жылдай өмірі Қазақ ұлттық университетінің тарих факультетімен байланысты. Ол 1978 жылы Ленинград мемлекеттік университетінде стажировкадан өтіп, ал 1980-1983 жылдары Мәскеу мемлекеттік университетінің аспирантурасында оқиды.

Н. Алдабергенев кәсіби археолог ретінде Оңтүстік Қазақстан археологиялық экспедициясының, Түркменстан археологиялық экспедициясының құрамында Ресейдегі, Еділ бойындағы археологиялық экспедицияларда жұмыс істеп, Алтын Орда дәуіріндегі қалалардың археологиясы мәселесімен айналасады. Отрар, Яссы қалаларындағы жүргізілген қазбаларға қатысты. Сөйтіп ол өзінен үлкен ғалымдардың бай тәжірибесін үйренеді. 1974 бастап Ұлттық университет жанында құрылған археологиялық экспедицияларға басшылық ете бастайды. Оның негізгі зерттеу нысаны Жамбыл облысы Шу ауданы өңірінде орналасқан ортағасырлық Ақтөбе қаласы болды. Н. Алдабергеневтың 20-ға жуық мақалалары ортағасырлық Ақтөбе қаласының археологиясына арналды.

Ғалым — археолог өзінің ұзақ жылдар бойы жинаған тәжірибесін археология мамандығы бойынша даярланатын студенттер мен аспиранттарға беріп, оларды ортағасырлық Ақтөбе қаласын қазу барысындағы практикаға баулады.

Ол әр жылдар бойы Ұлттық университетте археология мамандығы бойынша оқу құралдары мен типтік бағдарламалар жасауға белсене ат салысты.

Қазіргі кезде археолог-ғалым Н. Алдабергенев бүкіл Қазақстанға белгілі Отырар кешенді мұражайының Бас директоры қызметін атқаруда. Осы арқылы ол тарихи ескерткіштерді сақтау, қалпына келтіру, оны көпшілікке таныстыру сияқты маңызды шараларды жүзеге асырып жүр.

Тарих факультетінің ұжымы мерейтой иесін алпыс жасқа толған мерекесімен құттықтай келе, оған тағы да зор денсаулық, мол бақыт, отбасына амандық және шығармашылық табыстар тілейді.

К.М. Байпақов, Ж.К. Таймағамбетов